

■ CLAUSTRASON JON A MÜSTAIR

## Sora Domenica è vegnida benedida sco priura

(rtr) Ier è stadas las festivadas per benedir sora *Domenica* en sia nova funcziun sco priura da la claustra Son Jon a Müstair. Sora *Domenica* daventa successura da sora *Pia Willi* che ha manà 26 onns la claustra en il senn da l'ur-

den da son *Benedetg*. Dapi l'onn 2000 è sora *Domenica* stada sub-priura e cun quai il maun dretg da la priura da fin uss, *Pia Willi*. Sora *Domenica* è vegnida elegida sco nova priura ils 11 d'october en la claustra da Son Jon.



Sora *Domenica* daventa successura da sora *Pia Willi*.

FOTO D. SPINLER

■ GIUVAULTA

## Charrà sin la fallada vart e chaschunà trais blessads

(pocha) Dumengia saira è in automobilist charrà davent da Tusaun vers Gjuvaulta sin il fallà vial da la A13. Tar l'extrada a Gjuvaulta ha il manischunz vuli bandunar la A13. Curt avant che quai è reussì è el dentant collidà cun in auto che charrava correctamain vers sid. En quest auto èn duas persunas sa blessadas levamain. Tar questa collisiun è vegnì stgarpà davent ina roda davos d'in dals autos collidads. In terz automobilist ha percurschì memia tard la roda per terra ed è charrà sur quella or. Era quest manischunz è vegnì blessa levamain. Tut ils blessads èn vegnids transportads en il spital a Tusan. Il vial dal sid da la A13 è stà serrà per trais uras. Il traffic è vegnì svià sur la via chantunala.



KEYSTONE

## Gieus olimpics palpabels e per scuvrir

■ (rtr) Sin iniziativa privata dal biro d'architectura *Fanzun* e l'interpresa *Uffer* è vegnida preschenta ier a Savognin la chombra 2022. En preschientscha dal promotur per Gieus olimpics en Grischun, *Gian Gilli*, è la chombra en schember in emprim mussament da persistenza, sco ch'ils iniziants han intunà avant ils preschents. Il punct da partenza per l'idea saja stà da mussar las pussaivladads per edifizis temporars, ha ditg *Gian Fanzun*.

Cun la chombra olimpica, la chombra per ils atlets e las atletas duess ussa vegnir mussà sin ina turnea tras il Grischun che Gieus olimpics èn ina schanza er per ils mastergnants indigens. Las chombras cumpletas sa laschan posiziunar en tut las variantas. Suentar ils gieus olimpics è previs da duvrar las chombras en in auter lieu, per exempel per hotels da trais stailas u stanzas da students. *Gian Gilli*, il promotur dals Gieus Olimpics 2022 en il Grischun, ha discurrì dal

spiert olympic e da l'engaschament impressiunant dals iniziants da la chombra grischuna. «Quai è exact quai che gieus olimpics ed ina candidatura pon e duessan effectuar», ha ludà *Gian Gilli*. Ils 3 da mars decida il suveran Grischun davart ina candidatura per ils Gieus olimpics 2022.

Datas «roadshow» da la chombra grischuna: 29-01 Landquart; 30-01 Glion; 31-01 Muster; 02-02 San Murezzan; 03-02 Scuol; 04-02 Cuir; 05-02 Cuir; 06-02 Tavau

## Nov cumegnns ed ena fegnameira

Surses duess davantar martgea d'energeia

■ (anr/gns) Ena cumissiun d'energeia è vedlonder d'elaborar propostas concretas scu tgi igls nov cumegnns da Surses savessan promover energeia regenerabla ed effizienz d'energeia. Chegl è communitgia la direcziun digl Parc Ela. Siva digl 2009 s'occupeschan las nov vischnancas da Surses scu tgi ellas savessan promover energeia regenerabla ed effizienz d'energeia e retschever persiva igl «la-

bel» martgea d'energeia. Ossa vign la tgossa pi concreta cun decider igls nov cumegnns da Surses d'inoltrar agl Uffezi federal d'energeia la dumonda per en «label» per vischnancas cun ena politica d'energeia exemplarica. Gio la stad 2012 è igl Uffezi federal d'energeia tscharnia Surses scu egnas dallas 11 regiuns tgi sa participeschan a chel project. Cun chel project duessan igls nov cumegnns da Surses analizar igl ac-

tual e futur provedimaint d'energeia. An curt taimp è reuschia al las vischnancas da Beiva anfignen Salouf d'elaborar igls documaints basignevels per inoltrar la dumonda da retschever igl «label» scu martgea d'energeia. Ena cumissiun d'energeia cun *Angelo Vinzenz* da Rona scu president sa fatschainta pi intensiv cun chel project e duess cunzont accompagnar igl process ed elaborar propostas concretas.




La cumissiun d'energeia da Surses tgi sa fatschainta cugl project martgea d'energeia: *Angelo Vinzenz*, *Nora Herbst*, *Dieter Müller*, *Gianes Netzer*, *Rudi Collet*, *James Cristallo* e *Linus Felder* (da san.).

■ L'AURA

## La damaun sulegl e vers saira naiv

Situaziun generala: Aria pli chauda vegn manada vers las Alps. Oz: En il nord la damaun anc pulit sulegl. Dal nordvest vegn alur la plievgia e vers saira sa sbassa il cunfin da naiv sin 1400 m sur mar. Temperaturas la damaun en il nord entuorn minus 2 grads, durant il di fin 7 grads. En l'Engiadina per part sulegliv e bell'aura d'enviern. La damaun temperaturas da minus 18 grads e durant il di fin 7 grads. Prognosa: En il nord da noss chantun mesemna per gronda part sulegl cun temperaturas da 10 grads. En il sid ed en l'Engiadina mesemna sulegl e schizunt miaivel.



■ NOVITADS WWW.RTR.CH

## Dapli niz che custs

(rtr) L'artitgel da famiglias nizzegia dapli che quai ch'el custa, quai han ditg ils adherents dal nov artitgel costituziunel. Davart quest artitgel vegni votà ils 3 da mars. Il comité GEA a l'artitgel criticgescha vehementamain las calculaziuns orrentas dals adversaris. Ils custs enfin 12 milliardas francs sajan absurds e be per tementar. Il mument saja irresponsabel da numnar ina cifra per ils custs, han suttastritgà ils adherents.


## «Basler Zeitung» serra stamparia – 72 relaschadas

La stamparia da la «Basler Zeitung» serra definitivamain sias portas, ha decidi il cussegl d'administraziun suenter la procedura da consultaziun. 72 collavuraturas e collavuratur perdan lur plazza da lavur. Sco quai che l'interpresa communitgescha na sajan vegnidas inoltradas naginas propostas realisablas per manar enavant senza perditas la stamparia. La stampa vegn serrada sin la fin da mars. Per las 72 persunas perturgadas datti in plan social.

## L'ETH survegn 1 milliarda euros da l'UE

La Scola politecnica federala da Losanna survegn ils proxims 10 onns 1 milliarda euros daners da promoziun da l'UE. Ses Humain Brain Project, in project davart la perscrutaziun dal tscharvè, saja in dals dus projects victurs dal pro-

gram FET-Flagship, uschia ha fatg a savair l'ETH Losanna. Il project ha la finamira da simular il tscharvè dal carstgaun per pudair chapir meglier malsognas dal tscharvè e per uschia pudair sviluppar novs medicaments.



Per perscrutar il tscharvè survegn la Scola politecnica federala da Losanna ina milliarda francs da l'Uniu europeica.

## Ovra idraulica comunabla po vegnir construida

L'ovra idraulica comunabla tranter l'Austria e l'Engiadina Bassa po vegnir construida definitivamain. Avant in mais ha il senat da l'ambient austriac ditg gea a l'ovra sur cunfin tranter Martina e Prutz en il Tirol. Sco quai che pliras gaset-

tas dal Tirol rapportan haja i dà nagins recurs uschia ch'ils responsabls pon cumenzar cun las lavurs da preparaziun. L'ovra idraulica vul trair a niz l'ava da l'En tranter Martina e Prutz. Ella custa var 500 miliuns francs.

**OZ**  
**DIE SÜDOSTSCHWEIZ**  
 Unfall von Schlittler in Fideris wirft Fragen auf  
**Bündner Tagblatt**  
 Olympia-Zimmer aus Arvenholz bezugsbereit  
 BT und SO erhältlich an Ihrem Kiosk